

Kapítulo 12

DOKTRINA DI SALBASHON

Bèibel ta kita tur duda kua ruta ta guia na bida etèrno: Hesus. Pedro a splika di Hesus "no tin salbashon den ningun otro, pasobra no tin bou shelu ningun otro nòmber ku a wòrdu duná na hende, pa medio di kual nos mester wòrdu salbá" (Echunan 4:12). Hesus a deklará "Ami ta e kaminda, i e bèrdat, i e bida; niun hende no ta bin serka e Tata, sino pa medio di Mi" (Juan 14:6). Pero Iglesia di Hesukristo di e Santunan di e Delaster Dianan ta deskurashá nan miembronan di sigui Hesus i konos'E pèrsonalmente. E apòstel mormon, Bruce R. McConkie, a atvertí ku esnan ku ta pone un relashon pèrsonal ku Kristo komo "un meta den bida i ta konsentrá riba esei...lo bira loko."¹ Alkontrario e ta enkurashá kada mormon pa tin "su propio plan pèrsonal di salbashon."² Talbes ningun pèrsona lo tin e mésun plan di salbashon ku un otro pèrsona. Esnan ku ta hasi nan máksimo esfuerso lo yega na bida etèrno.³ Maske McConkie a rekomendá un plan di salbashon individual pa kada pèrsona, mormonnan tin nan dòktrina di salbashon.

I. E KAIDA DI HENDE

Segun dòktrina mormon, ora Eva a desobedesé, Adam a hañ'é den pèrtá, pasobra ya kaba Dios a duna nan e mandamentu pa multipliká i yena tera. Si Adam keda sin kome, anto nan lo no por obedesé Su mandamentu pa multipliká, pasobra nan lo no por a haña yu. Ma tambe Dios a prohibí nan di kome di e fruta di konosementu di bon i malu. P'esei Adam a hañ'é obligá pa skohe kua lei di Dios e lo desobedesé. Adam "intenshonalmente i ku sabiduria a disidí di obedesé e mandamentu promé i esun mas grandi; i p'esei, ku komprendementu di lokual e tabata hasi, el a kome di e fruta..."⁴ Adam a hasi e desishon korekto pa kome e fruta prohibí. Pues, nos ta yega na konklushon ku Adam su desobedensia no tabata algu serio.

I kiko di loke Eva a hasi? Segun iglesia mormon, Satanas tabatin rason ora el a bisa Eva ku nan "wowo lo habri i boso lo ta manera Dios, ku konosementu di bon i malu" (Genesis 3:5). P'esei Eva no a hasi malu ora el a kome di e palu di konosementu di bon i malu. Si loke Adam i Eva a hasi tabata piká, sigur e no tabata un piká grandi, segun mormonismo.

"Diabel a papia bèrdat...mi no ta akusá mama Eva... Lo mi no tabata ke pa e keda sin kome di e fruta prohibí pa nada den e mundu aki..."⁵

"E kaída di hende tabata un bendishon disfrasá...Nunka mi ta papia di e ròl ku Eva a hunga den e kaída aki komo piká, ni tampoko mi ta akusá Adam di piká..."⁶

Nota e siñansa aki bon! Komo ku Satanas a papia bèrdat, Adam i Eva a hasi bon pa kome di e palu prohibí na lugá di obedesé Dios. Pues, tabata mihó pa obedesé Satanas na lugá di Dios!

E buki mormon inspirá, *Perla di Gran Preis*, tambe ta komuniká esaki. Adam a bisa: "Bendishoná sea nòmber di Dios, pasobra pa motibu di mi transgreshon mi wowonan ta habrí, i den e bida aki lo mi tin alegria..." (Moises 5:10). Eva tambe a agregá: "Si no tabata pa nos transgreshon nunca nos lo por tabatin yunan, i nunca nos lo a konosé bon i malu, i e alegria di nos redenshon, i e bida etèrno ku Dios ta duna tur esnan ku obedes'é" (5:11).

E Santunan di e Deláster Dianan ta kere ku un benefisio di e kaída tabata ku Adam i Eva por a haña yunan. Si e kaída no a tuma lugá, lo tabata impusibel pa nan tin yu i pues hende lo no por a eksistí. Segun e *Buki di Mormon*:

"I awor, ata'ki, si Adam no a kometé transgreshon e lo no a kai, pero lo el a keda den hòfi di Eden...I nan lo no a haña yunan; p'esei nan lo a keda den un kondishon di inosensia, sin tin goso, pues nan no tabata konosé miseria; sin hasi bon, pues nan no tabata konosé piká...Adam a kai pa hende eksistí; i hende ta eksistí pa nan por tin goso" (II Nefi 2:22-25).

Pa kousa di e kaída, e biones di spiritunan pre-eksistente por haña kurpanan, loke ta esensial pa bira un dios.

Pa mormonismo, e desobedensia di Adam i Eva di bèrdat no tabata piká, i e kaída no tabata un kaída bèrdadero. Segun un outor mormon: "Adam a kai, ma el a kai den e direkshon korekto...den direkshon di e meta...el a kai den direkshon ariba".⁷ I un apòstel mormon a skirbi:

"Den Hosé Smith su filosofia di eksistensia Adam i Eva ta halsá na un lugá prominente entre e yunan di hende, di dos despues di e Salvador. Nan echu ta di aploudí. Nan tabata e pèrsonanan mas grandi di e siglonan. E asina yamá 'kaída' a bira un akto nesesario i onrado pa kumpli ku e plan di e Todopoderoso"⁸

E mésun outor a skirbi, "Nos, e yunan di Adam i Eva, por ta orguyoso di nos mayornan."⁹

II. HENDE LO NO TA KASTIGA PA E PIKA DI ADAM

Bèibel ta siña ku tur hende ta nase pekador i tin un tendensia pa hasi piká. Motibu pa esaki ta pasobra nos mayornan original, Adam i Eva, a hasi piká; i un pekador por prokreá solamente mas pekador. Por bisa ku tur hende a hasi piká den Adam. Romanonan 5:12 ta deklará: "...méskos ku dor di ún hende piká a drenta den mundu pa motibu, i morto dor di piká, i asina morto a pasa na tur hende, pasobra tur a peka." Mormonismo ta rechasá e siñansa aki. KREDU di e Iglesia di Hesukristo di e Santunan di e Deláster Dianan ta afirmá: "Nos ta kere ku hende lo haña kastigu pa nan propio pikánan, i no pa transgreshon di Adam."

Segun mormonnan, nos no ta kastigá pa e piká di Adam i Eva. Ma nan tambe ta kere ku e kaída a hasi un propisiashon nesesario, pa libra nos di e konsekuensianan di e kaída, morto físiko i spiritual, i hasié pusibel ku nos tur lo por resusitá for di morto. Kristo Su morto riba krus tabata un propisiashon pa satisfasé huisio divino. Atrobe nota ku algu no ta kuadra. Mormonismo ta siña ku e kaída di bèrdat tabata un bendishon, ku Adam a hasi e desishon korekto, ku e piká tabata nesesario pa hende por multipliká riba mundu. Anto nan ta kontradisí nan mes i bisa ku e kaída a pone hende eksperensia morto físiko i spiritual, neseditando morto di Hesus komo un propisiashon. Kua doktrina mormonnan ta kere di bèrdat?

III. TUR HENDE TA YUNAN DI DIOS KABA

Segun Bèibel, ningun hende ta yunan di Dios outomatikamente; p'esei hende mester bira yunan di Dios: "..tur esnan ku a risibiE, na nan El a duna e derechu pa bira yunan di Dios: esnan

ku ta kere den Su nòmber (Juan 1:12). Di bèrdad, Hesus a atvertí, “boso ta di boso tata e diabel i boso ke hasi e deseonan di boso tata...” (Juan 8:44). Ma Brigham Young ta kontradisí Bèibel atrobe:

"Na lugá di risibí e evangelio pa nos por bira yunan di Dios, mi palabranan ta—risibí e evangelio pa nos por SIGUI TA yunan di Dios. Nos tur no ta yunan di Dios ora nos a nase den e mundu aki? Fárao, rei di Egipto, tabata un yu di Dios mes tantu ku Moises i Aaron tabata Su yunan, ku e diferencia aki—el a nenga palabra di Señor, i nan a risibi e lus bèrdadero."

"Ma tur esnan ku a risibiE, na nan El a duna poder di *sigui ta* yunan di Dios"¹⁰

IV. SALBASHON GENERAL TA OFRESE NA TUR HENDE

Teologia mormon tin dos konsepto relashoná ku salbashon:

"Salbashon tin dos parti: General—esei ta pa tur hende apesar di nan kreensia (den e bida aki) den Kristo—i, Individual—esei ta loke hende ta meresé pa medio di su mes echunan durante bida i pa medio di obediensia na e leinan i ordenansanan di e evangelio."¹¹

Mormonismo ta opiná ku salbashon general—esta redenshon inkondishonal—ta apliká na tur hende, apesar di nan kreensia. Ku esaki nan ke men ku tur hende mester muri, pero redenshon inkondishonal ta sigurá ku tur hende lo resusitá.

"..redenshon inkondishonal...ke men pa restorá nos for di e estado mortal pa e estado inmortal; den otro palabra, pa duna nos e resurekshon. Esei ta bin na kada kriatura, i no na hende so ma tambe pa piská, paranan den laira, i bestianan di mondi...Tur di nan tabatin un eksistensia spiritual promé ku ku nan tabata poné riba mundu; p'esei nan lo ta redimí."¹²

V. SALBASHON INDIVIDUAL TA PA MEDIO DI OBRANAN

Mormonnan ta insistí ku nan dòktrina di salbashon individual ta eksigí fe di parti di hende i gracia di parti di Dios. Ma e outor Bruce R. McConkie no ta reflehá gracia bíbliko ora e ta skirbi: "Pasobra nos sa ku ta pa medio di gracia nos ta salbá despues di hasi loke nos por."¹³ Segun mormonismo, gracia ta ofresé solamente na esnan ku ta obedesé e mandamentunan i ta proba nan mes digno. Ma gracia no ta gracia si e ta ofresé solamente na esun ku ta digno. E gracia di Dios den Bèibel ta ofresé no na esun ku ta digno, ma na esun ku *no* ta digno i ta atmití esei. Pekadornan indigno so por probechá di e gracia di Dios i haña salbashon.

En realidat e Santunan di e Deláster Dianan ta kere den salbashon pa medio di obranan. Maske e obra propisiatorio di Kristo a sigurá tur hende ku nan ta resusitá, esei no ta garantisá ku e pèrsona lo yega den e reino selestial. E mes mester lucha pa perfekshon, santifikashon, i divinidat. Mas despues nos lo mira algun obra spesífiko ku iglesia mormon ta haña esensial pa salbashon. Pero pa awor, ripará dos di e Artíkulonan di Fe den e kredo mormon:

"3. Nos ta kere ku pa medio di e Propisiashon di Kristo, tur humanidat por ta salbá, pa medio di obediensia na e leinan i ordenansanan di e Evangelio.

4. Nos ta kere ku e promé prinsipionan i ordinansanan di e Evangelio ta: promé, Fe den Señor Hesuskristo; di dos, Arepintimentu; di tres, Boutismo via di inmershon pa pordon di pikánan; di kuater, ponementu di man pa (risibí) e don di Spiritu Santu."

Segun e artíkulonon aki, nos ta salbá pa medio di fe den Kristo; ma no fe so. Obranen mester kompañá e fe. Nota tambe ku maske mormonismo ta deklará ku e fe mester ta den Hesus, den realidat e ta fe den Hosé Smith, ku, segun nan, "a hasi mas pa salbashon di hende den mundu, ku eksepsyon di Hesus, ku kualke otro pèrsona ku a yega di biba riba mundu" (*Dòktrina i Aliansanan* 135:3).

Bèibel ta kontradisí mormonismo su demanda pa obranan pa salbashon: "Pasobra pa medio di grasía boso a wòrdu salbá dor di fe, i esei no di boso mes; e ta e don di Dios; no komo resultado di obranan, pa ni un hende no gaba" (Efesyonan 2:8-9). "El a salba nos, no a base di obranan ku nos a hasi den hustisia, ma segun Su miserikòrdia..." (Tito 3:5).

Salbashon mormon ta ofresé na e hustu so: sin rektitut, no tin pordon di piká, i sin pordon, no tin salbashon pèrsonal. Ma segun Bèibel, Hesus "no a bin pa yama e hustunan, sino pekadónan" pasobra "no esnan ku ta salú tin mester di dòkter, sino esnan ku ta malu" (Mateo 9:12-13).

VI. E SANGER DI KRISTO NO POR KITA TUR PIKA

Segun iglesia mormon, e sánger di Kristo ta kita solamente e piká di Adam; i esaki ta garantisá resurekshon pa tur, inkluiendo tur bestia i para. Ma e sánger di Kristo no ta kita piká individual; esaki por ta pagá solamente pa medio di obedensia total na kada mandamentu.

Ma e dòktrina aki tin un banda spantoso ku mormonnan ta tene sekreto. Brigham Young a siña ku e sánger di Kristo nunca por paga pa sierto piká; *un sakrifisio humano—e persona su propio sánger—so por kubri'é i kumpra pordon.*

"No tin un hòmber òf muhé, ku ta violá e aliansanan di nan Dios, ku lo no ta eksigí pa paga e debe. E sánger di Kristo nunca lo kita esei, bo mes sánger mester ekspiá p'é..."¹⁴

"...bou di sierto sirkunstansia tin algun piká serio pa kua e purifikashon di Kristo no ta apliká, i lei di Dios ta indiká ku e ora ei hende mester drama nan propio sánger pa ekspiashon di nan pikánan."¹⁵

Kua pikánan ta asina malu ku e sánger di Kristo no por ekspiá? Doktrina mormon no ta lista esakinan kla, pero aparentemente matamentu, adulterio, ladronisia¹⁶, usa nòmber di Dios pòrnada¹⁷, gañamentu¹⁸, òf maldishoná Hosé Smith òf su religion¹⁹ a demandá ehekutashón pa ekspiashon. Ta parse ku e piká mas serio ta pa bandoná iglesia mormon. Esun ku mata un pèrsona ku a bira lomba pa mormonismo, ta salba e pèrsona ei su alma. Nota loke Brigham Young a splika:

"Awor suponé ku un pèrsona den e kongregashon aki tin konosementu tokante salbashon...i suponé ku e ta han'é den un piká grosero, ku el a kometé un piká ku e sa lo prevení e di yega na e eksaltashon ku e ta deseá, i e no por alkans'é sin drama su sánger, i e tambe sa ku dor di drama su sánger lo e ekspiá pa e piká ei, i ta salbá i eksaltá ku e Diosnan, tin un hòmber òf muhé presente den e kas aki ku lo no bisa 'drama mi sánger pa mi por ta salbá i eksaltá ku e Diosnan?'

Tur hende ta stima nan mes, i si un hende sa e prinsipionan aki, lo e ta kontentu pa laga drama su sanger. Esei lo ta stimashon propio, pa yega na eksaltashon etèrno. Lo bo stima bo rumannan hòmber i muhé méskos, ora nan kometé un piká ku no por ta ekspiá sin dramamentu di nan propio sánger? Lo bo stima e hòmber òf muhé ei basta pa drama nan sánger?

Mi por kontábo di hopi kaso di hende ku a wòrdu matá hustamente, pa ekspiá nan pikánan... Mi a mira..sentenares di hende ku lo tabatin un chèns (den e último resurekshon lo tin) si nan a kita nan bida i drama nan sánger na suela, komo un sensia ku ta huma pa e Todopoderoso, ma ku awor ta angelnan di diabel...Mi a konosé hopi hende ku a bandoná e iglesia aki pa ken no tin ningun chèns pa eksaltashon, ma lo tabata mihó pa nan si nan sánger tabata dramá, e maldat i ignoransia di e nashonnan ta prohibí di práktika e prinsipio aki, ma tempu lo bin ora lei di Dios lo ta na vigor.

Esaki ta stimando bo próhimo méskos ku bo mes; si e tin mester di yudansa, yud'é; i si e ke salbashon i ta nesario pa drama su sánger riba tera pa e por ta salbá, dram'é. Kualke di boso ku a komprendé e prinsipionan di etèrnidad, si boso a hasi un piká ku ta eksigí dramamentu di sánger, ku eksepsion di e piká mortal, lo no keda satesecho ni sosegá te ora boso drama boso sánger, pa boso por haña e salbashon ku boso ta deseá. Esei ta e manera pa stima humanidat."²⁰

Kisas nos ta pensa ku esei ta siñansa mormon ma ku sigur mormonnan no a yega di praktiká dramamentu di sánger pa ekspiashon di piká. Ma lamentablemente ta parse ku nan a praktiká loke nan a prediká! E storia di Rosmos Anderson ta un ehèmpel. E tabata ke kasa ku yu di su di dos esposa. Ma un tal Klingensmith tambe tabata ke e mésun dams, i pa hañ'é a akusá Rosmos di adulterio. E konsilio mormon a vota pa Anderson muri pa su piká sin dun'é chèns pa defendé su mes.

"Anderson, siendo un keredor firme den e dòktrina i siñansa di iglesia mormon, no a argumentá, ma a pidi pa e por tin mitar dia pa prepará pa su morto. Nan a bai di akuerdo. Su esposa a haña òrdu pa prepará paña limpi pa dera su esposo, i a inform'é ku (su esposo) lo ser matá pa su pikánan, i ku e mester bisa esnan ku ta puntra pa su esposo ku el a bai na (estado di) California.

Klingensmith, James Haslem, Daniel McFarland i John M. Higbee a koba e graf den un kunuku serka di Cedar City, i e anochi ei, pa 12 'or, a bai na kas di Anderson i a duna òrdu pa e prepará pa obedesé e Konsilio. Anderson a lamta, bisti, yama su famia ayo, i sin un palabra di reprehendementu a kompañá esnan ku el a kere tabata hasi boluntat di 'Dios Todopoderoso.' Nan a bai na e graf ku nan a koba; Anderson a hinka rudia banda di e graf i a hasi orashon, Klingensmith i su kompañénan a kòrta garganta di Anderson for di un orea te otro orea i a tené pa su sánger basha den graf.

Mes ora ku e tabata morto nan a bistié den su paña limpi, i a tir'é den graf i der'é. Anto nan a hiba su paña tur na sánger pa su famia, i a duna nan na su esposa pa laba, i a instruí'é atrobe pa bisa ku su esposo tabata na California. El a obedesé nan òrdu."²¹

Hopi mormon aínda ta kere e dòktrina aki. Maske Iglesia di Hesukristo di e Santunan di e Deláster Dianan no ta ehikutá hende mas, ta parse ku algun sekta mormon si ta praktik'é. Ta remarkabel tambe ku pa hopi aña solamente estado di Utah (unda gran mayoria di e poblashon ta mormon) ta duna tiramentu komo un opshon pa ehekushon. Teologia mormon ta eksigí dramamentu di sánger, i segun nan, kamber di gas, stul di koriente, i palu di horka, métodoan ku tur otro estado merikano ta usa pa ehekushon, no ta drama sánger. Poko aña pasá, estado di Idaho, ku awor tambe ta kontrolá polítikamente pa mormonismo, a adoptá tiramentu komo un manera di ehekushon.

Den un kaso hopi publiká, un asesino mormon, Gary Gilmore, a keda ehekutá dor di tiramentu 17 di yanüari 1977...pa ekspiá su piká ku su propio sánger. Ora nan a haña Mark Hoffman kulpabel di a mata dos pèsona ku un bòm na Salt Lake City, Utah, 23 di yanüari 1967, su tata, un mormon deboto, a rog'é pa pidi pa ehekushon dor di tiramentu pa ekspiá su piká. El a keda desapuntá ora su yu a opta pa keda será bida largu.

Ta bèrdat ku e sánger di Kristo no por kita *tur* piká? Segun Bèibel, mormonismo ta kiboká. Apòstel Juan inspirá pa Spiritu Santu ta sigurá nos ku "...sánger di Hesus..ta limpia nos di *tur* piká...Si nos konfesá nos pikánan, E ta fiel i hustu pa E pordoná nos nos pikánan i pa limpia nos di *tur* inhustisia" (I Juan 1:7,9). Palabra di Dios tambe ta enfatisá ku nos ta salvá solamente pa e sánger dramá di *Kristo*, no loke nos por hasi. "Sabiedo ku boso no a wòrdu redimí ku kosnan ku ta peresé, manera plata òf oro, for di boso manera bano di biba...ma ku sánger presioso, komo di un Lamchi sin defekto i sin mancha, e sánger di Kristo" (I Pedro 1:18-19). Skritura ta papia kla: e sánger di Kristo por ekspiá *tur* piká, i *solamente* Su sánger por hasi esei.

VII. KASI TUR HENDE LO TA SALBA FINALMENTE

E siñansa ku tur hende lo ta salvá finalmente tabata proklamá pa hopi predikador liberal den era di José Smith. Ma el a rechasá e dòktrina aki totalmente. Ora el a skirbi e *Buki di Mormon*, su rechaso di e dòktrina aki a sali bon kla:

"Di manera ku si e hòmber ei no arepentí, i keda i muri un enemigu di Dios...e hòmber ei no tin derecho di risibí misericòrdia; p'esei su destino final ta pa soportá un tormento sin fin" (Mosía 2:38-39).

"...nan ta gosa den nan obranan pa un temporada, ma finalmente fin ta bin, i nan lo ta di kap i tirá den kandela, for di unda no por regresá" (III Nefi 3:11).

"I esun ku no ta soportá te na fin, esei ta esun ku tambe lo ta di kap i tirá den kandela, for di unda nan no por bolbe, pa motibu di hustisia di e Tata" (III Nefi 3:17).

Ma poko tempu despues ku José Smith a skirbi e *Buki di Mormon*, el a kambia su kreensia. Na mart 1830, Smith supuestamente a haña un revelashon ku e kastigu na fiernu lo no dura pa eternidat. El a deklará, "sinembargu, no ta skirbí ku e tormentu aki lo no tin fin, ma ta skirbí tormentu sin fin" (*Doktrina i Aliansanan* 19:6). Anto e ta sigui purba proba ku "kastigu etèrno" no kier mèn ku e pekador lo sufri pa tur etèrnidat.

E apòstel mormon, John A. Widtoe, a deklará ku e "yunan di pèrdishon" so lo no ta salvá. "Tur otro, ku no ta klasifiká komo yunan di pèrdishon, lo ta 'redimí na tempu di Señor;' esta, nan tur lo ta salvá. E pekador di mas grandi lo haña un lugá den e sferanan di shelu... Pa Iglesia di Hesukristo di e Santunan di e Deláster Dianan, no tin fièrnu. Tur hende lo haña un midí di salbashon... E evangelio di Hesukristo no tin fièrnu..."²²

En kontraste, Bèibel ta revelá ku kastigu na fiernu ta etèrno: "E ora ei lo E bisa tambe na esnan ku lo ta na Su man robes: '...boso maldishonánan, bai den e kandela etèrno, prepará pa diabel i su angelnan. I esakinan lo bai den kastigu etèrno..." (Mateo 25:41,46). "...huma di nan tormentu ta subi bai ariba pa semper i semper; i nan no tin sosiegu di dia ni anochi..." (Revelashon 14:11).

VIII. HOSE SMITH LO DETERMINA KEN LO DRENTA E REINO SELESTIAL

E presidente mormon, Joseph Fielding Smith, a proklamá:

"[No tin] salbashon sin aseptá Hosé Smith. Si Hosé Smith tabata un profeta bèrdadero, i el a papia bèrdat...Ningun hende por rechasá e tètimonio ei sin risibí e konsekuensianan mas teribel, pasobra lo e no por drenta e reino di Dios."²³

Segun Bigham Young:

"Kada spiritu ku konfesá ku Hosé Smith ta un profeta, ku el a biba i muri komo un profeta i ku e Buki di Mormon ta bèrdat, ta di Dios, i kada spiritu ku no ta (hasi esei) ta (spiritu) di anti-Kristo."²⁴

"...ningun hòMBER òf muhé den e dispensashon aki lo drenta e reino selestial di Dios sin pèrmit di Hosé Smith... Kada hòMBER i muhé mester tin e sertifikado di Hosé Smith, 'junior,' komo un pasaporte pa nan entrada den e manshon ariba unda Dios i Kristo ta... Mi no por bai aya sin su pèrmit... E ta reina aya komo un ser mes supremo den su esfera, kapasidat, i yamada, ku Dios den shelu."²⁵

E outor mormon, Bruce McConkie, a skirbi:

"Si no tabata pa Hosé Smith i e restorashon, lo no tabatin salbashon; no tin salbashon pafó di e Iglesia di Hesukristo di e Santunan di e Deláster Dianan."²⁶

IX. KON PA BIRA UN DIOS

Meta di kada mormon ta pa bira un dios òf diosa. Segun nan presidente, Spencer W. Kimball, "hende por transformá su mes...e tin den su mes e simianan di divinidad ku por krese. E por hisa su mes dor di ranka su propio feter di sapatu."²⁷ Den otro palabra, obranan i propio esfuerso ta nesesario pa alkansá divinidad. Kiko ta algun obra ku mormonismo ta spesifiká pa bo por bira dios?

A. Bo Mester ta un Mormon

Riba e pregunta "Tur hende, ku eksepshon di mormonnan, lo ta kondená?" Hosé Smith a kontestá, "Si, i un gran parti di nan, si nan no arepentí, i hasi obranan di rèkstitut."²⁸ I Brigham Young a deklará ku un pèrsona ku no ta kere den Hosé Smith i Brigham Young no por ta salbá:

"Kere den Dios, kere den Hesus, i kere den Hosé su profeta i den Brigham su susedor. I mi ta agregá, si bo kere den bo kurason i konfesá ku bo boka ku Hesus ta e Kristo, ku Hosé ta un profeta, i ku Brigham ta su susedor, lo bo ta salbá den reino di Dios."²⁹

"...Kada spiritu ku no ta konfesá ku Dios a manda Hosé Smith, i a revelá e evangelio etèrno pa medio di dje, ta e anti-Kristo."³⁰

E apòstel mormon, Orson Pratt, a deklará:

"Tur esnan ku lo no arepintí...i sali for di iglesianan dekaí i wòrdu adoptá den Iglesia di Kristo i buska ku fervor e bendishonnan i donnan milagroso di e evangelio lo wòrdu tirá abou den fiernu, Señor Dios di Ehèrsitonan ta bisa."³¹

Segun mormonismo, nan ta e úniko pueblo bèrdadero di Dios i no tin salbashon fuera di e iglesia aki.

B. Bo Mester a Batisá Komo Mormon

Boutismo tambe ta esensial pa e mormon yega na divinidad. "Boutismo ta...e porta pa drenta e reino di shelu, un paso esensial den nos salbashon i eksaltashon."³² Mormonnan ta insistí tambe ku mester pone e pèrsona kompletamente bou di awa (sumershon) ora e ta batisá. "I e ora ei boso lo sumergí nan den awa, i sali atrobe di e awa" (III Nefi 11:26).

C. Bo Mester ta un Mormon Digno

Dr. Harold Goodman, presidente di mishon mormon na Inglatera, a laga sa ku e pèrsona:

"..mester ta digno; e mester tin un entrevista satisfaktorio ku su obispo i ku presidente di su barío.

Esei ta e úniko manera ku nos por ta huntu ku nE [nos Tata selestial] pa goberná i reina ku nE. Di otro manera, nos lo no por ta den Su presensia."³³

D. Bo Mester a Eksperensiá e Kasamentu Selestial

Pa bira un dios, e kandidato mester ta un pèrsona kasá.

"...nos por krese kontinuamente i desaroyá i bira un dios *si* nos risibí den kas di Señor e ordenansa sagrado komo esposo i esposa. Mester hasi esaki (alkansá divinidad) huntu. E no por ta un meta individual."³⁴

Ma pa kasa so no ta basta. E mester ta un kasamentu selestial pa etèrnidat, un rito spesial den un tèmpe mormon.

"Kasamentu sivil ta produsí sirbidónan den etèrnidat...Kasamentu selestial ta produsí diosnan den eternidat."³⁵

E "ordenansa kulminante di Evangelio nesesario pa divinidad ta kasamentu selestial...Matrimonio no solamente ta un institushon rekto, ma obedensia na e lei aki ta apsolutamente nesesario pa optené e eksaltashon di mas haltu den Reino di Dios."³⁶

"Meta di kada santu di último dia ta pa kasa komo un famia den kas di Señor i risibí ei e bendishonnan sagrado aki ku lo pèrmití nos finalmente, si nos ta digno, di biba den presensia di nos Tata selestial."³⁷

Presidente Spencer W. Kimball a proklamá:

"Solamente dor di matrimonio selestial un pèrsona por haña e kaminda smal. No por haña bida etèrno di ningun otro manera. Señor tabata masha spesífiko i masha presiso den e asunto di matrimonio"³⁸

Presidente Kimball a bisa ku Señor a papia di esaki, pero ni Bèibel ni e *Buki di Mormon* ta mensioná matrimonio selestial. E tabata un di Hosé Smith su propio "revelashonnan."

E. Poligamia

Den pasado, mormonnan a para riba ku poligamia ta un eksigensia pa divinidat. Bigham Young a afirmá ku "e úniko hòmbèrnan ku ta bira diosnan, asta Yunan di Dios, ta esnan ku ta tuma parti den poligamia."³⁹ E apòstel mormon, Orson Pratt, a laga sa tokante poligamia: "Señor a bisa, ku esnan ku rechasá e prinsipio aki ta rechasá nan salbashon, nan lo ta kondená, Señor ta bisa..."⁴⁰ Joseph F. Smith, di seis presidente di iglesia mormon, a deklará tokante poligamia: "...kada hòmbèr den iglesia ku tin abilidad di obedesé i praktik'é den rèkstitut i no ta hasi'é, lo ta kondená..."⁴¹

Segun doktrina mormon aktual, poligamia no ta nesesario pa bira un dios. Di bèrdat loke tabata esensial antes awor ta konsiderá piká.

"Kualke pèrsona ku ta..tuma parti den matrimonio plural awendia, miéntras esun ku ta tene e yabinan a kita e poder di praktik'é, ta kulpabel di maldat grosero. Nan ta biba den adulterio, ya kaba a bende nan alma ku Satanas, i...lo ta kondená pa etèrnidat. Matrimonio plural no ta esensial pa salbashon òf eksaltashon."⁴²

F. Bo Mester ta Perfekto

Segun iglesia mormon, semper a eksistí sierto leinan universal—asta promé ku Dios a eksistí. Di bèrdat, Dios (ku antes tabata un kriatura) a bira Dios dor di obedesé e leinan aki shen porshento. (Pues e leinan ta mas grandi i mas importante ku Dios.) Awor hende tampoko no por yega na divinidat si nan no obedesé e leinan aki perfektamente.

"Nos mayornan selestial dor di eranan di tempu i un multitud di eksperensianan gradualmente a haña sa di e leinan etèrno innumerabel i a apliká nan na nan bida.

Miéntras nan a siña e bèrdatnan aki i kon pa trata ku nan, pa medio di esei e leinan a someté na Elohim i for di e tempu ei nan ta Su leinan—òf, den otro palabra, e Evangelio di Hesukristo."⁴³

"El a bira Dios pa medio di obedensia apsoluto na tur e leinan etèrno di e Evangelio..."⁴⁴

E di diesdos presidente mormon, Spencer Kimball, a deklará enfátikamente:

"E progreso aki den direkshon di bida etèrno ta un asunto di perfekshon. Bibando tur e mandamentunan ta garantisá pordon total di piká i ta sigurá bo di eksaltashon pa medio di e perfekshon ku ta bin dor di kumpli ku e instrukshon ku Señor a duna nos."⁴⁵

"Tur transgreshon mester ta limpiá [pa medio di e ritonan di tèmpep i bon obra], tur debilidad mester ta vensé promé ku un pèrsona por yega na perfekshon i divinidat."⁴⁶

Un di e miembronan di e Konsilio di Diesdos Apòstelnan mormon, Howard W. Hunter, a deklará:

"Salbashon ta un proseso di propio perfekshon den i pa medio di iglesia mormon."⁴⁷

Riba e punto aki mormonnan tin rason. Segun Skritura tin solamente dos pusibel ruta pa salbashon: 1) dor di Dios Su obra, òf 2) dor di bo propio esfuerso. Si bo rechasá Dios Su oferta grátis di salbashon dor di Hesus, anto e úniko otro ruta pa salbashon ta “obedensia apso-luto”. Lo bo mester warda tur mandamentu di Dios shen porshento, 24 ora pa dia, bida largu (mormonnan tin 4.300 lei). Ni un piká ta pèmití pa esun ku ta buska di yega na salbashon dor di esfuerso propio. Pues e ruta aki ta eksigí nada ménos ku perfekshon total. Ma e ruta aki tambe ta presentá un problema sumamente serio, pasobra ta *impusibel* pa un pekadador hiba un bida totalmente perfekto bida largu.

Komo ku ta impusibel pa haña salbashon dor di esfuerso propio, Dios a manda Su Yu, Hesus, ku a hiba un bida perfekto, sin piká, sufri e kastigu ku bo a meresé pa bo piká, pa duna entrada na shelu pa esun ku lo konfi'E por kompleto. P'esei Hesus a bisa: "Ami ta e kaminda, e bèrdat, i e bida; ni un hende no ta bin serka e Tata, sino pa medio di Mi" (Juan 14:6).

I lektor, bo tambe tin ku skohe kua di e rutan aki lo bo sigui. Bo por konfia bo propio esfuerso i religion, pa dunábo entrada serka Dios. Ma e ruta aki ta impusibel, pasobra Dios ta demandá nada ménos ku perfekshon. Pues, en realidat e úniko rekursu ku ta kedábo ta pa rekonosé ku bo no por satesfasé Dios Su demanda pa perfekshon, atmití ku bo ta un pekadador, i pidi Kristo Hesus pa salbábo.

E krus di Kristo ta e úniko ruta pa salbashon. Ma komo mormonnan a opta pa rechasá Kristo, ta lógiko pa nan purba yega na divinidat dor di obranan perfekto...lógiko, pero impusibel. P'esei nos ta bisa ku mormonnan tin rason pa eksigí perfekshon pa nan por yega na divinidat.

Ademas, mormonnan ta kere ku nan lo por sigui nan lucha pa perfekshon i divinidat despues di morto. Kimball ta splika:

"Despues di un periodo lo tin un resurekshon...ku lo hasi nos inmortal i hasi'é pusibel pa nos sigui nos subida den direkshon di perfekshon i divinidat."⁴⁸

Te ki tempu e mormon lo yega na "perfekshon i divinidat?" Trágikamente, nan mes no sa. Spencer Kimball a skirbi:

"...Señor Heskristo...a duna nos nos mapa—un lista di leinan i mandamentunan pa medio di kua nos por alkansá perfekshon i, finalmente, divinidat."⁴⁹

Tantu den bida komo despues di resurekshon e mormon ta sigui su esfuerso, ku e speransa ku "finalmente" kisas e lo yega na divinidat. "*Finalmente" por indiká un lucha di miones di aña; hopi esfuerso pa algu hopi insierto.* Esun ku ta kuminsá sigui e ruta aki no sa ki dia e lo alkansá divinidat perfekto. Esaki ta un ruta di frustrashon, sin speransa; e no ta e "evangelio"—bon nobo. Mormonnan ta hende masha kansá, trahando duru pa algu impusibel pa alkansá.

En kontraste Bèibel ta bisa: "E kosnan aki mi ta skirbi boso ku ta kere den nòmber die Yu di Dios, pa boso por sa ku boso tin bida etèrno" (I Juan 5:13). Esun ku ta konfia Kristo so pa salbashon por ta sigur ku e lo ta aseptá; pa motibu di e perfekshon di Kristo, no dor di su esfuerso.

Pa hopi mormon, e lucha pa ta digno ta muchu difísil. Tin tantu mandamentu pa warda pa bira un dios ku nan ta desmayá. Ta kalkulá ku 70 pa 75% di mormonnan nunca ta kalifiká pa tuma parti den e ritonan sekreto den un tèmpep mormon, un rekisito importante pa yega na divinidat. I di esnan ku ta bira digno pa partiisipá den e ritonan den tèmpep, un porsentahe chikitu so ta keda digno i ta sigui partisipá den e ritonan den tèmpep (loke ta asina esensial pa bira un dios).

"Pues e pùzel mormon: pafó di iglesia no tin salbasyon, tòg den iglesia no tin speransa tampoko, pasobra ningun pèrsona ku ta onesto ku su mes por pretendé di kumpli ku e eksigensianan di rèkstitut pèrsonal."⁵⁰

Tur esnan ku ta buska bida etèrno dor di propio esfuerso, religion, dignidat, èts. lo keda mes frustrá pasobra "no tin ni un hende hustu, ni sikiera ún " (Romanonan 3:10). Nan ta sigui un kaminda ku ta guia na frakaso i derota. Kristo Su obra so ta aseptá pa Dios; nos por konfi'E por completo.

Ma kon e Santunan di e Deláster Dianan ta reakshoná si un mormon ke bandoná su religion i konfia Hesus so pa salb'é? Nan ta pone preshon na diferente manera pa e no bai. Por ehèmpel, pa e por kita su nòmber for di e lista di miembronan, mormonnan lo tin un rat di ekskomunikashon. Pues den analnan di iglesia mormon ta pará skirbí ku nan a ekskomuniká e pèrsona—no ku el a pidi pa kita su miembresia. Tin ora e motibu pa ekskomunikashon ta falsifiká—ta mal propaganda pa iglesia mormon si un hende bisa ku el a bandoná Iglesia di Hesukristo di e Santunan di e Deláster Dianan pasobra el a haña sa ku esaki ta un mentira total. Un dama soltera a pidi pa kita su nòmber di lista di miembresia despues di a konfia Kristo komo su Salbador. Iglesia mormon a inform'é ku nan nótulonon lo bisa "ekskomuniká pa motibu di fòrnikashon"—un mentira total. E obispo mormon a insistí ku e dama pronto lo ta kulpabel di fòrnikashon bibando su so separá di e iglesia bèrdadero. Ta solamente ora e obispo a haña un yamada telefóniko di abogado di e dama soltera, el a hala tras.⁵¹ Nan a hasi asina pa pone preshon riba e dama pa keda den iglesia mormon unda nan ta kere tin salbasyon.

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51